

ACORDO DE COLABORACIÓN ENTRE A CONSELLERÍA DE EDUCACIÓN, CIENCIA, UNIVERSIDADES E FORMACIÓN PROFESIONAL E O SERVIZO GALEGO DE SAÚDE PARA A IMPLANTACIÓN DUN SISTEMA DE FORMACIÓN PROFESIONAL DUAL

MEMORIA XUSTIFICATIVA

O xerente do Servizo Galego de Saúde, **DECLARA QUE:**

A Consellería de Educación, Ciencia, Universidades e Formación Profesional e o Servizo Galego de Saúde asinaron o 12.03.2025 o acordo de colaboración arriba referido. O acordo estará vixente ata a finalización do proxecto. Non entanto, as partes acordaron que os seus efectos sexan retroactivos dende o 1 de setembro de 2024, consonte co disposto no artigo 39.3 da Lei 39/2015, do 1 de outubro, do Procedemento Administrativo Común das Administracións Públicas.

O dito acordo ten por obxecto establecer ás condicións de colaboración entre a Consellería de Educación, Ciencia, Universidades e Formación Profesional e o Servizo Galego de Saúde para o desenvolvemento da formación práctica, en centros asistenciais do Servizo Galego de Saúde, polo alumnado dos centros educativos CIFP Ánxel Casal - Monte Alto e o ES Ricardo Mella que curse o título de Técnico/a Superior en Imaxe para o diagnóstico e medicina nuclear. Todo iso no marco do previsto na Lei orgánica 3/2022, do 31 de marzo, de ordenación e integración da formación profesional, que establece no artigo 3.1.g) que o sistema de formación profesional se desenvolve, entre outros, conforme o principio de participación das empresas e os axentes económicos e sociais no deseño, no desenvolvemento, e avaliación e innovación da formación profesional, asegurando o circuíto de transferencia de coñecemento formación-empresa e o interese público; e no artigo 3.1.b) do Real Decreto 1529/2012, do 8 de novembro, polo que se desenvolve o contrato para a formación e a aprendizaxe e se establecen as bases da formación profesional dual.

Os proxectos de formación profesional dual recollidos neste acordo con códigos C2024014801 no CIFP Ánxel Casal - Monte Alto e C2024000901 no IES Ricardo Mella teñen as seguintes características:

- a) Toman como referencia as ensinanzas reguladas no Decreto 75/2016 do 28 de abril, polo que se establece o currículo do ciclo formativo de grao superior correspondente ao título de Técnico/a Superior en Imaxe para o diagnóstico e medicina nuclear.
- b) Coa finalidade de satisfacer a crecente necesidade que se está a producir en todos os ámbitos produtivos para que as persoas conten con destrezas de comunicación específicas do sector profesional, este proxecto ten carácter plurilingüe. O alumnado participante, ademais de realizar a formación establecida na alínea anterior, debe cursar os módulos formativos de Lingua estranxeira profesional que se establecen no plan de formación deste proxecto.

- c) Terá como duración desde o 01.09.2024 ata o 31.08.2026.
- d) A formación impártese de xeito compartido entre os centros educativos e o Servizo Galego de Saúde garantindo a adquisición dos resultados de aprendizaxe establecidos para as ensinanzas conducentes á obtención do título de Técnico/a Superior en Imaxe para o diagnóstico e medicina nuclear. O Servizo Galego de Saúde responsabilizarase da formación do alumnado no 44% das horas que integran o currículo das ensinanzas deste proxecto.
- e) Ademais, atendendo ás características do Servizo Galego de Saúde, durante o primeiro ano de vixencia destes proxectos dedícase un 10 % do tempo de estadía do alumnado, nos centros asistenciais que se determinan, á formación complementaria establecida nos currículos das ensinanzas correspondentes, para reforzar a formación do alumnado e a mellorar a súa empregabilidade. No segundo ano, esta porcentaxe será do 5 %.
- f) Para o curso 2024/2025 a incorporación do alumnado será a partir do 22.04.25 ata 31.07.25 e no curso 2025/2026 do 09.02.2026 ata 31.07.2026.

O inicio das prácticas está previsto realizalo no mes de abril do ano 2025 coa duración establecida no plan formativo e un total de 44 alumnos/as distribuídos/as segundo o seguinte cadro:

Nº de alumnos/as FP dual por centro hospitalario: Imaxe para o diagnóstico e medicina nuclear		
Centro	Número de alumnado	Centro no que realizarán a prácticas de medicina nuclear
Complexo Hospitalario Universitario de A Coruña	9	Centro Oncolóxico de Galicia
Complexo Hospitalario de Vigo	9	Galaria - Vigo
Complexo Hospitalario de Santiago	7	Complexo Hospitalario de Santiago
Complexo Hospitalario de Lugo	5	Complexo Hospitalario de Lugo
Hospital Público de A Mariña	1	Complexo Hospitalario de Lugo
Complexo Hospitalario de Ourense	5	Galaria - Ourense
Complexo Hospitalario de Pontevedra	4	Complexo Hospitalario de Santiago
Complexo Hospitalario de Ferrol	4	Centro Oncolóxico de Galicia
	44	

Para o financiamento dos gastos derivados deste acordo prevese un crédito de setecentos corenta e un mil setecentos noventa e catro euros con oito céntimos (741.794,08 €), dos que douscentos sesenta e catro mil trescentos dez euros con sesenta e catro céntimos (264.310,64€)



fináncianse con cargo aos orzamentos do Servizo Galego de Saúde para o ano 2025 e catrocentos setenta e sete mil catrocentos oitenta e tres euros con corenta e catro céntimos (477.483,44 €) financiaranse con cargo á partida orzamentaria que corresponda dos orzamentos do Servizo Galego de Saúde para o ano 2026, condicionado neste caso á existencia de crédito axeitado e suficiente nos ditos orzamentos.

Existe converxencia de intereses entre as entidades asinantes en orden á consecución do referido obxecto.

O acordo suscrito fundaméntase no seguinte:

O devandito acordo, constitúe un acordo específico tramitado en desenvolvemento dun acordo marco de colaboración asinado o 17 de xaneiro de 2024 entre a Consellería de Cultura, Educación, Formación Profesional e Universidades e a Consellería de Sanidade para impulsar e potenciar a formación profesional no ámbito sanitario.

A Lei orgánica 3/2022, do 31 de marzo, de ordenación e integración da formación profesional especifica no seu artigo 3.1.g) que o sistema de formación profesional se desenvolve, entre outros, conforme o principio de participación das empresas e dos axentes económicos e sociais no deseño, no desenvolvemento, na avaliación e na innovación da formación profesional, asegurando o circuíto de transferencia de coñecemento formación-empresa e o interese público.

Por outra banda, no seu artigo 6 establece os obxectivos do Sistema de Formación Profesional, entre os cales figuran:

- a) A posta a disposición das empresas e dos sectores produtivos dos perfís profesionais necesarios en cada momento, tendo en conta o carácter determinante, para a competitividade das empresas, da cualificación das persoas traballadoras, a súa flexibilidade, a rapidez de adaptación, a polivalencia e a transversalidade.
- b) O impulso da dimensión dual da formación profesional e dos seus vínculos co sistema produtivo nun marco de colaboración público-privada entre administracións, centros, empresas ou organismos equiparados, organizacións empresariais e sindicais, entidades e terceiro sector, para a creación conxunta de valor, o aliñamento dos obxectivos e proxectos estratéxicos comúns, a superación da fenda en tre o urbano e o rural a través dunha adecuada adaptación territorial, e o uso eficaz dos recursos en contornas formativas e profesionais.

O Sistema Sanitario é unha organización baseada no coñecemento, prestadora de servizos e multidisciplinar, caracterizada por unha notable complexidade organizativa e por un gran desenvolvemento científico e tecnolóxico.

A complexidade organizativa, a súa incesante innovación e incorporación de novas tecnoloxías e a heteroxeneidade dos recursos humanos cos que conta, fan que o ámbito sanitario permita a



estudantes de diversos graos de formación sanitaria dual sanitarios e non sanitarios, enfrontarse a situacións reais de esixencia profesional, forxar a actitude e predisposición necesaria para a asunción das responsabilidades e facilitar a planificación dunha carreira profesional axustada aos seus intereses e capacidades.

O Servizo Galego de Saúde, organismo autónomo adscrito á Consellería de Sanidade desde a súa creación pola Lei 1/1989 do 2 de xaneiro, ten entre as súas funcións a xestión das prestacións sanitarias e a xestión dos centros, servizos e establecementos sanitarios propios ou adscritos ao mesmo, así como o desenvolvemento de programas de docencia que lle sexan encomendados pola Consellería, dentro da súa competencia ou que sexan necesarios para os seus fins.

No artigo 126 da Lei 8/2008, do 10 de xullo, de saúde de Galicia, relativo á "Colaboración en materia de educación e sanidade", entre outros, dise que os centros de formación profesional da rama sanitaria contarán con centros asistenciais concertados, segundo as necesidades das distintas especialidades e de acordo con as necesidades organizativas do Sistema Público de Saúde de Galicia (apartado 3) e que as Consellerías competentes en materia de educación e sanidade promoverán a revisión e mellora continuada dos programas docentes dos ensinos relacionados coas ciencias da saúde, ao obxecto de conseguir a mellor adecuación da formación dos profesionais e as necesidades do Sistema Público de Saúde de Galicia. (apartado 4).

Con acordo suscrito trátase de cumprir o obxecto da cualificación profesional das persoas, combinando os procesos de ensino e aprendizaxe na empresa e no centro de formación, propiciando unha participación máis activa da empresa no propio proceso formativo do alumnado e, daquela, permitir que estas coñezan de xeito máis próximo a formación que reciben, cada vez máis adaptada ás demandas do sector sanitario.

Os intereses converxentes das partes asinantes exclúen o ánimo de lucro, e non podían satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estimouse xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago,

